

2003-01-09
kioskoa

Iban Arregi

**'Prestige',
bigarren lerrora**

Prestige petroliontzia hondoratu zenetik, oso gutxitan zabaldu du beste gai batekin **El País**-ek *España* saila. Baina, *Prestige* gaia ez denean, *euskal* gaia izan ohi da. Atzo, esaterako. «Alonso epaileak erabakitako bi etakideren askatasunaren kontra agertu da fiskala», zioen *España* saileko lehenengo orrialdean. «Bost etakideren ihesaldi saioa bertan behera utzi dute La Santen», ondoren. Bata-suna legez kanporatzeko Espainiako Auzitegi Goreneko auzialdiei buruz, hitzik ez. **Abc**-k ere Ruth Alonsoren erabakiarekin zabaldu zuen *Nacional* saila, eta etakideen ustezko ihesaldi saioa zekarren ondoren. Espainiako Auzitegi Goreneko auzialdiei buruz, hitzik ez. Kataluniako **La Vanguardia**-k Parisko ustezko ihesaldi saioarekin zabaldu zuen egunkaria —eta, horrenbestez, *Política* saila—, eta Ruth Alonsoren erabakiari eman zion hurrena garrantzia handiena. Espainiako Auzitegi Goreneko auzialdiei buruz hitzik ez **La Vanguardia**-k ere. **El Mundo**-k bai, **El Mundo**-k aipatu zituen Auzitegi Goreneko auzialdiak, baina nabarmenago aipatu zituen ustezko ihesaldi saioarena eta Ruth Alonsoren erabakiarena. Eta **El Diario Vasco**-k ere antzera egin zuen: Auzitegi Goreneko Batasunaren kontrako auzialdiak aipatu zituen, baina *Política* saila ustezko ihesaldi saioarekin zabaldu zuen. *Prestige* petroliontzia, azken aldian oso gutxitan gertatu den arren, bigarren lerro batean genuen atzoko Espainia aldeko egunkarietan, eta *euskal* gaiak hartu zuen lehenengo lerroa; baina Batasunaren kontra gaur abian jartzekoak diren auzialdiak nahikoa ezkutan joan ziren, ustezko ihesaldia- ren eta Ruth Alonsoren erabakiaren ondorioz.

martintxo**hizpideak****Behar politikoen
menpeko auzia**

Batasunaren kontrako prozesuan, hasiera-hasieratik, Espainiako Gobernuak presaka jokatu du. Hasiera batean, Alderdien Legea indarrean jartzeko, gero lege horretaz baliatuz Batasunaren kontrako auzia abiatzeko. Legea onartu berria izan arren, abuztuko oporrak eten, Espainiako Kongresuko Diputazio Iraunkorra bildu eta ezohiko

osoko bilkura bultzatu zuen Batasunaren kontrako auziari oporren osteko lehen Ministroen Kontseiluan bidea emateko. Horren ondoren, Espainiako Estatuko abokatuak eta fiskalburuak oso epe laburrean aurkeztu zituzten eskabi-deak Auzitegi Gorenean. Presa horren funtsezko arrazoia politikoa da: Batasuna legez kanpo uztea maiatzeko hauteskundeak baino lehen. Batasunaren legez kanporatzea eskatzeko frogai buruzko eztabaida atzo hasi zen Auzitegi Gorenean. Ondoko egunotan beste hiru saio izango dira, eta, ondoren, azken

alegazioak aurkezteko epea irekiko da. Frogak eztabaidatzeko lehenengo saioa nahikoa izan da Estatuko abokatuak eta fiskalburuak aurkeztutako frogabideak eta azaldutako argudioak oinarri gabekoak direla ikusteko eta, bide batez, auzia Espainiako Gobernuaren presa edo behar politikoa menpe dagoela agerian uzteko. Esanguratsua da oso Estatuko abokatuak eta fiskalburuak eskatutako lekukoen testigantzak haien tesiak berresteko barik defentsarenak laguntzeko balio izatea, atzoko saioan gertatu bezala.



Ignacio Sierra, Francisco Hernando eta Luis Gil Suarez.

Pilotari guztiak, Eskuz Binakako Txapelketaren aurkezpenean.



Egunkaria
euskal duon 3.753. zenbakia

Ohorezko Lehendakaria: Martin Ugalde

Administrazio Kontseiluko Lehendakaria: Joan Mari Torrealdai

Kontseilari Ordezkarria: Iñaki Uribe

Zuzendaria: Martxelo Otamendi

Gerentea: Begoña Zubelzu

Publizitatea: Igor Sota

Egoitza Nagusia: Martin Ugalde Kultur Parkea 20140 Andoain Tel.: 943300222
Erredakzio faxa: 943300255-943590354 Publizitateko faxa: 943300707

Webgunea: www.egunkaria.com

Posta elektronikoa: egunkaria@egunkaria.com

Publizitatea: publi@egunkaria.com



Batzorde Perekidea: 72564 E Lege Gordailua: SS 800/901 ISSN 1134-640X
OJDK IKUSKATURIKO HEDAPENA

ORDEZKARITZAK ■ Araba: San Antonio, 20-1. ezker. 01005 Gasteiz
Tel.: 945233872 Faxa: 945233873 Publizitatea: Tel.: 945131965

Nafarroa: Iratxe Monasterioa, 45-13. esk. (Irritzi dorrea) 31011 Iruñea
Tel.: 948178078-79 Faxa: 948178077 Tel.: Publizitatea: 948176686

Bizkaia: Egia Jenerala, 3-behea. 48010 Bilbo Tel.: 944104046 Faxa: 944103715
Tel.: Publizitate Orokorra: 944701199-80 Publizitate Lokala: 944701114

Lapurd, Nafarroa Beherea, Zuberoa: Pelletier 35,
64100 Baiona Tel.: 559593575 Faxa: 559257511

**ELAk urte berrirako
dituen asmoak**

ELA sindikatuak argitu ditu atzoko bilera orokorraren ondotik 2003ko Negoziazio Kolektiborako dituen asmoak. Hiru ardatzetan laburbildu daitezke asmo horiek: enplegua sortzea, diskriminazioa saihestea eta soldata duinak lortzea. Inflazioa baino bi puntu gehiagoko soldata igoera eskatu, eta emakumeek eta gazteek duten lan egoerari aurre egin nahi die ELAk, eta horretan bide garrantzitsua da Negoziazio Kolektiboa sindikatuko kideek nabarmendu zuten moduan.

**Ariel Sharon
ikerketapean**

Israelgo lehen ministro Ariel Sharon ikertzen hasi da Israelgo Fiskaltza Nagusia. 1999an Likud alderdiaren buruzagitzarako kanpainan jasotako diru laguntzen inguruko xehetasunak eskatu ditu, eta Sharonen bi seme ere inplikaturik daude. Fiskaltzak esan du ez duela auzia epaitegietara eraman-go hilaren 28an Israelgo hauteskundeak egin artean, baina abian jarritako ikerketa, Sabra eta Shatilako sarraskien ondoren Sharonen aurka hasitako bigarrena, ez da berri ona Sharonentzat hauteskunde bezperan.

**Eskuz Binakako
Txapelketa**

Atzo aurkeztu zuten aurtengo Eskuz Binakako Pilota Txapelketa. Hamar bikotek hartuko dute parte; urtarrilaren 10etik bertatik hasi, eta finalerdietara ailegatu aurretik ligaxka bat jokatuko dute, bi taldeetan banatuta. Ez da azken orduko ezusteko aipagarriarik egon bikoteei dagokienez, baina, aipatzekotan, Asegarek eta Aspek gazteen aldeko apustua egin dutela aipa daiteke. Gainera, txapelketan pilota hautatzaile bakarra ariko da, bi enpresetatik kanpo dagoena, Atano XIII.a, eta nabarmentzekoa da hori.